




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA

1839

O LE SULU SAMOA

MATI 2017

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

150 Tausaga EFKS Aai a Niue - Apia

Novema 1886 - Novema 2016

Ua tala mai le lagi le mamalu ma le silisiliese o le Atua, ua faaalua foi e le vanimonimo galuega mamana a ona aao, ua faaalua i lo

outou soifua ma so matou ola le alofa ma le agalelei o le Atua ua le mavae, aua lupe sa vao eseese a o lenei ua tatou fuifui faatasi i le

futiafu e tasi.

E'e ia la i vaatapu o outou paia ma sa, o le a le oo iai se faamatalaga a le *faaaauau itulau e 2*

O LE ATA - o le Keke o le faailogaina o le 150 tausaga o le lotu i le Aai a Niue, Apia, na faia i le masina o Novema i le tausaga ua mavae - 2016.

Veronika:

le fafine na maua i
le ma'i punatoto
mai le tusi:

**The Day I Met
Jesus**

silasila itulau e 8

**O le Teineitiiti ma
le Ta'ita'i'au
Fiatagata**

silasila itulau e 12



O Mataupu Ogaoga

“Ia mua’i tala’iina foi le tala lelei i nuu uma lava e ao ai.” - Mareko 13: 10

O faafitauli uma e tula’i mai i lo tatou lalolagi o se avanoa taua lea - o se avanoa mo i tatou

tagata o le Atua, e faalauiloa ai le tala lelei. E faigofie lava ona tatou manatu popole pe o le a faapefea ona aafia ai tatou i sea faafitauli. Ae a pe a tatou *silasila itulau e 12*

150 Tausaga EFKS Aai a Niue - Apia

Novema 1886 - Novema 2016

mai le itulau muamua

aauauna aua e le gafataulimaina i lo'u nei vaivai. Ae o le a nuunuu atu ia faatini o tausala i faleupolu o tofiga ma lo latou fatuaiga tausi, ae o le a faagafua ia le tulai ae magalo se tautalaga.

Ou te mua'i faatulou ai i le susu o Lau Susuga i le Toeaina le ta'ita'i o le sauniga, ma le mamalu o le vasega o toeaaina ma le aufaigaluega ua aliita'i ai paia o Samoa ua potopoto.

A o le e'e mai o lau Afioga i le Ao Mamalu o le Malo, lau Afioga Tupua Tamasese Efi ma le masiofo, susu Afioga i Sui o le Fono a Sui Tofia, le afio o lau Afioga le Alii Palemia, Tuilaepa Sailele Malielegaoi ma lou faletua, susu lau Afioga le alii Faamasino Sili Patu Tiavaasu'e ma lou faletua,.

Susu Afioga i alii Minisita ma Afioga i faipule ma o outou faletua, afio lau Afioga le Seumanutafa o le Usoalii o le Aai o Niue nei, le afio lava lea i le Alo o Sina ma le mamalu o le Fuaifale o Salevalasi o loo pola puipui e le Faletolu ma le Vaigalelepa ma upu ia Tuisamau. Le paia o Samoa ua potopoto, ae tainane aiga ma uo ma aumea mamae a lenei Ekalesia.

Tulou, Tulou, Tulou lava.

Fakalofa lahi atu ke he lau lilifu osi mai he motu ko Niue. Ke he lilifu e matua pelesitene he Ekalesia Kerisiano Niue, Rev. Vilikamupala Viviani. Ke he lilifu he tohikupu he Ekalesia Kerisiano Niue, Rev Nukanuka Tauvevini Moe Tokoua, fekafetau e Atua mo e tautaki tokoua, mo e tau lilifu osi ne hokohoko mai Niusila, Ausetalia, mo Niue. Fakalofa lahi atu ke he higoa he ha Tautolu a Iki, ko Iesu Keriso. Fakaue kua hohoko monuina mai he fakalofa he Atua. Greetings to you all in the name of our Lord Saviour.

Ae ona ua tofia a'u e fai se faamatalaga o lenei aulotu ma lona faavaeina mai se'ia oo mai i lenei aso ona ou popo'e lea ona o ai lava au le tagata faatauvaa, ua na o se faifeau ua faapea mai tala a tamaiti, o se tala mosi lava.

Ae o le a ou aga'i atu ia se'i sunu'i alafale se'i tau faailo ala o le lupe, o lupe sa fa'ia mai i le fuifui na tu ma olo i Sinave ma Ulu o Motootua nei, ma faavae lenei aulotu ua atoa nei le 150 tausaga.

E pei ona silafia ai le to'a 14 o le aufaigaluega faifeau mai le motu o Niue o e sa muai asaina mai le gasu o le taeao o le Tala Lelei i le Usoalii o Seumanutafa mai le tausaga e 1866 seia pa'ia le tausaga 1975 ma galue mai ai le uluai faifeau Samoa o Enele Sulufa'iga Samasoni ma sosoo mai ai ma si ou nei fasi Niue.

E tele se faamatalaga i le afuafua mai o lenei aulotu aua sa le faigofie i ni tagata ese mai se isi atunuu ona nofoia se fanua tau Samoa, a o lenei ua tau mai le sa o nai Niue ona o le Atua na faavae ai Samoa.

I nai faamatalaga sa faapea ona maua i tusitusiga a le tama'ita'i o Margret Pointer i lana tusi Niue 1774-1994 200 tausaga o fesootaiga ma suiga, i le tausaga 1863 na ave ai ni tagata Niue sa silia ma le 100 o e sa faamalosi ona aumai i le vai taimi o le Labour Trade o le ave faamalosi ma le faagaioi o tagata e faatau atu ma galulue i Peru, a o isi ua auina mai ma galulue i le popo ma le suauu o le kamupani Siamani o Godfferry and Sons Limited i Samoa nei.

O loo masalomia o nisi o i latou nei sa faavaeina lenei aulotu. A o nisi foi o faamaumauga i tusitusiga a Mason Leonard i le "In Search of a Home", sa faapea ina ua faatulafonoina i le 1865 le faafaigaluegaina o tagata poo le Labour Trade, ona malaga mai ai lea o Niue sa silia ma le 100 o e galulue

malosi ma atamamai i le saolotoga sa iai e galulue i le Copra ma le Rubber. Lea foi la e iai masaloga o i latou ia na aumau solo i Apia ma oo ai ina latou maua le fesootaiga ma le Alo Sina o le Afioga ia Seumanutafa Moepogai ma to ai lo latou matupalapala ua avea ma Usoalii o Seumanutafa e pei ona iai nei le Ekalesia i le Aai o Niue nei i eleele o Seumanutafa.

Ina ua faavaeina la le aulotu nei i le 1866, sa auina mai lava o faifeau mai le Ekalesia Niue e pei ona molimauna iai e le toa 14 o faifeau. Sa amata mai i si fale Samoa i lumafale atu nei e paepae i maa. A oo ina to pese o sauniga ua tata pe faapa'o'o maa e to ai le pese lotu sa usuina lava i le gagana Niue, ae faatoa usuina lava o pese Samoa i le vaitau o le tausaga 1960 i le vai taimi o le faifeau o Alesana Halanetau.

Mai lena nofoaga seia oo mai i le nofoaga leni ua tatou potopoto mai, ua fa ai falesa sa tapuai ai i latou i le Atua, e faapea maota o faafeagaiga sa galulue iinei, ua fa ai i le fale sa faatoa faapaiaina atu nei.

Ina ua malolo manumalo le faifeau ia Alesana Halanetau i le 1975 ona toe tausaili lea o se faifeau mai Niue, peitai ane ua utiuti le aufaigaluega mai Niue o lea na tatalo mai ai le Ekalesia Niue, e saili i le Ekalesia i Samoa nei so latou faifeau e pei ona valaauina ai loa Enele Sulufaiga Samasoni le uluai faifeau Samoa.

Sa tele se sao o lenei aulotu ua le gata i le Ekalesia Aoa o le malo foi ma ona taumafaiga e pei ona toatele o i latou o e ua pale mai i tulaga tofi o le malo ua le gata i lena vaitau ae ua oo mai lava i ona po nei, o e sa faafailele atu i lenei Ekalesia lo latou soifua aoaoina i le mafaufau atoa ma le faale-agaga.

Sa faailogaina i le aulotu nei i le *silasila itulau e 4*

O LE LAUGA

Tusi Faitau: Le Pese a
Solomona 7:1-12

Matua: (f12) *Ia ta ala usu i tovine,
ma ta matamata ai po ua fuga
vine, po ua matala ona fuga, po
ua toe olaola rimoni; ou te alofa
atu ia te oe i lea mea.*

**Manatu Autu: E malosi se
faatasiga pe a tutusa alofa**

O le faataotoga o le vaega o le tusi
lenei o le Pese a Solomona, o loo
aumaia o se pese o loo lagi fetalia'i
ai se alii ma se tamaitai.

O le pese foi a le alii e tali ai le
ofo alofa mai o lana uo ia te ia. O
loo manino lava foi i le gagana o
le pese a le alii, le tai foliga tutusa
o ata faa-faatusa o loo ia
faaogaina e faamatalaina ai, e lē
gata o le lalelei o lana uo, ae
faapena foi lona ia alofa ma le
ofoina atu atoa o ia mo lana uo. O
lona uiga, o le alofa i le va o lenei
tamaitai ma le alii, ua lē o se alofa
e mamafa pito-tasi, ae o le alofa e
fetafea'i mai i le tasi i le isi. Ua
leai ni tuaoi o toe saisaitia ai le
feofoofoa'iga o alofa. Lea lava e
manino mai i le gagana o le pese
nei, o ata faatusa ua faaogaina ua
faaalua ai se mafutaga ua militino
ma feuluulua'i faatasi.

E pei la ona faaogaina vaega
eseese e mafai ai ona iloa ai e le
tagata se vaega: e pei o le vaai o
mata, o le tago poo le pa'i i ai o le
lima, o le tofo i fofoga ma le
lagonaina o le manogi i le isu. O
le mafai ona iloa e ala i faalagona
uma nei, faato'a tupu ina ua ō
faatasi le naunau atu o le tasi ma
le faatagana a le isi.

O lona uiga, ua le o se mafutaga
ua faamalosi, ae o le faatasiga a
tagata ua tutusa alofa. Pau lea o le
ituaiga alofa e faamalie loto ma
faatupu malosi.

E le mafai lava ona sese le
manatu lenei; a tutusa ma fetafea'i
le alofa, o le alofa lona e malosi.
Ae ua tele mafutaga ua masofasofa
ona ua lē mafai ona tausia le mea
taua lenei. Ua le o le alofa tutusa
ma fetafea'i, ae ua alofa e faapito
ai manu-ia-tasi. Ua manao i le
alofa e na ona tafe mai, ae ua lē
mafai ona alofa atu.

Peitai, e faasino-ala le alofa lea
na poloai mai ai lo tatou Alii
Faaola: ***O le poloaiga fou ou te
tuuina atu ai ia te outou, ia outou
fealofani; faapei ona ou alofa atu
ia te outou, ia fealofani foi outou.
O le mea lea e iloa ai e tagata uma
lava o o'u soo outou, pe afai ua
outou fealofani.***

Ioe le Ekalesia, o le anava tauave
lena faasoo o Keriso, o le
fealofani. O le faailoga lona o le
alofa tutusa ma le alofa fetafea'i:
O le Fealofani. Tasi o le mea, ua
lē faigofie nei aso. Ua tauau ina
malosi le fai ma se tāu i ai. Ua tuli
lava le 'ai o le tagata ia. Toe taga'i
lava i lou faavae le Ekalesia, ae a
Samoa o lo'o faavae i le Atua na
ama ai lona finagalo i lona Alo e
toatasi, ae na auina mai lava e fai
ma taulaga o le faolataga mo le
lalolagi uma.

Ae o le faailoga foi lona ua
faataoto mai e le Alii Faaola e iloa
ai i latou ua avea ma ona soo, o le
alofa tutusa poo le fealofani. Le

Ekalesia ma Samoa, ua na o lona
lo tatou ala i malo ma manuia e
faavavau o le Atua.

O se taumafaiga ma se faamalosi
i lenei tausaga 2017, e malosi ma
maua'a le faatuatua o lau Ekalesia,
ina ua tutusa le alofa ma faatasia
uma i tatou i le Alofa o lo tatou
Atua.

Ia manuia ou faiva i aso uma le
Ekalesia Aoa, i Tama o le
Ekalesia, le Auaigaluega totofi
seia oo lava i le loaloa i fanau.
Tupulaga talavou ma le fanau laiti,
ma ia manatua: O aiga, o nuu, o
ekalesia ma se malo malosi – e
maua ina ua faatasia ma tutusa
alofa, o le alofa lona faa-le-Atua.
O le alofa ua poloaia ai i tatou
uma, tatou te alolofa ai e pei ona
alofa mai o Iesu i le lalolagi atoa.
A'o le alofa foi ua fotua'i mai ai
ata-o-taulelei i galuega tetele a le
tatou ekalesia, lea ua gasologa
lelei ma manuia ai, ona ua tatou
maua pea le alofa tutusa i taimi ma
aso uma o lo tatou ola.

Ia Manuia tele lenei vaitau o le
tausaga i galuega uma o feagai ma
le Ekalesia, ona o le agalelei ma
le alofa o le Atua. Manuia foi le
Pulega ma le mamalu i le Ofisa o
le Sulu Samoa i ala faalauiloa aua
le Atua ma lana galuega.
Ia manuia tele foi le **faa-Mati o
lenei tausaga i le ekalesia**, i le alofa
mai o lo tatou Alii.

Ona o Iesu lo tatou
Faaola...Amene.

Saunia:

Rev Lealoo Polutea (FS)

EFKS: Lepa

150 Tausaga EFKS Aai a Niue - Apia

Novema 1886 - Novema 2016

mai le itulau e 2

1894 le 50 tausaga talu ona taunuu le Tala Lelei i le motu o Niue e pei ona fitaituga ai lupe faalele o le Ekalesia Samoa. Sa afea foi lenei aulotu i taimi e usuia ai fono faafuasei o le Ekalesia Samoa. Sa tapuvae tasi mai i lenei Ekalesia ma lona falesa le tapueina o faigalotu e faasalalau i le leitio i Aso Sa taitasi. Ma le tele ma le anoanoai o nisi sao taua o lenei Ekalesia i le aai o Niue nei.

Ae ina nei ou lagi se viiga o le aulotu, ae ona o le auga o aute ma

le faamoemoe sei tau lava ina faamaalo le i'u ofe i lo latou soifua galulue e fai lea ma viiga o le Atua.

A o se to manatu ai foi i sao taua o nai tuua o e na asaina le gasu o le taeao o le Tala Lelei, ua le gata i faifeau galulue, a o nai matua ua saga mai apouli lo latou soifua e pei ona iai o suli ma feoi ua latou auvasa mamao mai se'i molimau ma manatunatu ma le loloto i sao ia o nai o latou tuua.

O lenei la ua atoa le 150 tausaga o le Ekalesia i le Aai o Niue, o le

tasi o uso matua o le Tala Lelei e pei ona tusia e le tama ia Alesana Halanetau i le faasalalauina o le faamanatuina o le 100 tausaga o le Ekalesia.

A o saunoaga a le tamā ia Faleniu Asaua - o Ierusalemava lava lenei, e tupito oe ae ua fai ma nuu filifili o le nuu paia.”

O le a sii i uta lo'u sa ae folau i lagima le faamoemoe o lenei aso.

“Ierusalemava e, Ierusalemava e, aua lava nei galo oe ia te au, a galo ia galo lava i lo'u lima taumatau, ia pipii ae lo'u laulaufaiva i lo'u gutu.”

Saunia e Rev. Efu Efu FS

Failauga mo le Sulu Samoa 2017

	<u>MASINA</u>	<u>MATAGALUEGA</u>	<u>SUAFA</u>	<u>AULOTU</u>
1.	Ianuari	Sulu Samoa	Afemata Aiavao	Faatonu Sulu Samoa
2..	Fepuari	Malua	Tavita Pulu FS	Togo
3.	Mati	Lotofaga/Lepa/Aleipata	Leoo Polutea FS	Lepa
4.	Aperila	Falealili/Safata/Siumu	Momo'e Gagaeolo FS	Si'unui
5.	Me	Faasaleleaga	Faamanuia Faaaliga FS	Papa Puleia
6.	Iuni	Ituotane	Lauitiiti Vaega FS	Matavai
7.	Iulai	Fiti	Siu Vaifale FS	Fiti
8.	Aokuso	Amerika Samoa	Alapi Eti FS	Tafuna
9.	Setema	Kolisi Malua	Karanita Petaia FS	Kolisi Malua
10.	Oketopa	Ofisa Tutotonu	Enoka Aperaamo FS	Ofisa Aoaoga Kerisiano
11	Novema	Ofisa Tutotonu	Ulale Sakaio AM	Ofisa Aoaoga Kerisiano
12	Tesema	Ofisa Tutotonu	Poasa Toiaivao FS	Ofisa Faamisionare

O LE LAUGA

(O le lauga na faamoemoe mo le masina o Fepuari 2017)

Tusi Faitau: Eseta 7: 1 – 10

Matua: Eseta 7 ao se vaega o le fuaiupu e 10. ***“Ona latou faatautau ai lea ia Hamanu i le laau na ia saunia mo Moretekai.”***

Manatu Autu:

‘Ua faatautauina Hamanu.’

Ua faatautauina Hamanu, o se faasalaga. Le tala ua tatou masani ai, fai mai o le mea na fafauina e Hamanu, na toe lavea ai lava. O Hamanu o se alii sili, tofia e avea ma Palemia o Metai ma Peresia, i le faigamalo ma pulega a le tupu o Asueru. I le vaitau na toe foi ai i Ierusalem le to’atele o tagata Iutaia na faatafea i Papelonia. Manino lava ma iloa. O Hamanu o se tagata faamoemoeina.

O lona faamoemoeina lea na tuuina ai e le tupu o Asueru, le pule, na te vaايا ai itumalo ma tagata, o loo i lalo o pulega a Metai ma Peresia i le taimi lea. Le pule e na te faia ai se faaiuga, i se mea e manao ai, auā le lelei ma le tumau pea o le malosi o Peresia. Pau lava lea o le faailoa i le tupu.

Le maualuga lea o le tulaga o Hamanu, e tatau ai ona ifo tagata uma e iai i le faitotoa o le tupu, pe a ulufale ma ulufafo Hamanu. Peitai, e lei ifo iai Moretekai, le tagata Sa-Iuta. Na avea ai ma mafuaaga na matua

ita ai Hamanu, e le gata o Moretekai, a o ona tagata. Fafau ai lea e Hamanu se auala e fasiotia ai, e le gata o Moretekai, a o ona tagata. Talosaga ai lea o Hamanu i le tupu o Asueru, e aumai se faatagana sei faaumatia ai tagata ia, ona o lana molimau, ua latou le usitaia tulafono a Peresia. Faia e Hamanu le mea lea, e aunoa ma sona iloa, o Eseta o le afafine o Moretekai. O Eseta foi o le Sa-Iuta.

Fai mai le tala, na talia e le tupu le mana’oga o Hamanu, e aunoa ma sona silafia, o Sa-Iuta, o le aiga lea ma le nuu o Eseta, lana masiofo. Le vaisua ma le vala lea, e lei oo iai se iloa o Hamanu. Na o le Atua na te silafia. E iloa ai le eseese o le potu ma le atamai faa-le-tagata soifua, ma le silisili ese o le Atua.

Le Atua na folafola lona puipuia o lana tagata faatuatua. Lea na tauala mai i lana auuina o Eseta, na tautino ia Moretekai, ua malie e fesoasoani e faasao Sa-Iuta, tusa lava pe oti ai. O le le sao o togafiti leaga, e faaleaga ma faatoilalo le isi tagata, ona o le faaloloto ma le naunau i le mamalu ma viiga. Manino lava i le tala, o le iuga o tagata faapea, e faasalaina.

Ua tatou masani i lenei tala, ma e avea pea ma tala e faamanatu ai pea iai tatou le iuga o le ola taulamalama.

Lea ua toe faamanatu mai i lenei aso. Soia ia le faufau i isi uso a tagata e ala i togafiti le lelei. Togafiti ua afaina ai se

soifua ma le ola o nai isi o tatou uso. O le mea moni lava ia, se e le moe le fili. E vaai atu loa ua lelei le isi, taumafai loa e fai se auala e faaleaga ai. A le o lena foi, nei avea le naunau i le mamalu, viiga, tamāoaiga, e galo ai se va nonofo, o ni uso, tuafafine, aiga o se nuu ma se aulotu.

Nei tatou manatu ia tatou lava ae galo ai le isi uso, o loo mana’omia foi le fia ola. Fai mai le Talalelei, e le i’u i se lelei na uiga ma faiga. E faasalaina. Ua aumai ai foi se faamalosiua mo le tagata faatuatua i lenei aso. O le ua i le Alii, e le faapopoleina i ni mailei ma togafiti le lelei. O le tagata lava ua iai le Alii, talitonu ma le faatuatua i le Alii e le tuulafoaiina e le Atua.

Le tagata e tumau pea le faatuatua, ma le soifua taumafai mo le Atua.

Ona ou manatua ai lea, o se tala i se tamaitiiti, na faasino iai e lona tamā se pito mauga, fai mai e nofo ai se tagata. Ona fai lea iai o le tamā i lona atalii: “Sau e alu i le mauga le la, ma valaau i le tagata lena, “Sole e te fia ulavale”, ma faalogo poo le a sana tali mai. Ona alu lea o le tamaitiiti, ma toe foi mai fai i lona tamā.

‘Tamā, ou te valaau atu, pe fia ulavale, ae tali mai le tagata o loo i le mauga: ‘Sole e te fia ulavale.’ E fia ulavale foi le tagata la e i luga o le mauga.

Ona toe fai atu lea o le tamā i lona atalii, ‘Atalii, toe alu i le mauga
faaauau itulau e 6

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

O Faaletonu i le Aufaigaluega Ma Faafitauli tau ia Naila

O sauaga ogaoga na oo i Kerisiano Quakers, e na o le faalua lava ona aliali ai ni lagona o Siasosi Fosi e uiga i ia sauaga, muamua - ina ua sauaina fafine ma tamaiti; lua - ua faavaivai lana uo o Semisi Naila.

O Naila na alia'e i vai taimi a o faia e Siasosi Fosi ana sauniga tala'i i le itu i matu o le atunuu. O Naila o ia o se tasi o ta'ita'i Quakers aupito sili ona alualu i luma lona aoga. O ia o se failauga e lelei atu i lo Siasosi Fosi lona faamalamalamaina o se mataupu. I le manatu o nisi o Kerisiano, e sili le femili o Naila ma tagata i lo Siasosi. O le mafuaaga ona o lea e galue lava Naila i le aai tele o Lonetona e matua toatele ona tagata, ae o le la e le iloa atu Siasosi ma ana mea o fai i le itu i Matu.

Ua le lavā Naila i le mamafa o le galuega, faatasi ai ma le malosi o

viiga o fai mai e tagata sa faalogologo i ana lauga, o upu faaviivii a tagata aemaise tama'ita'i e uiga i ana lauga, ua tau faaletonu ai le mafaufau o Naila ona ua manatu nisi, aemaise lava tama'ita'i, o ia o se mesia. Ua latou taumulimuli ia te ia, ma ifo ia Naila e pei o ia o se tagata pa'ia.

Na faafalepuipuina Naila ina ua ia asiasi i se tasi Kerisiano Quakers. Na iloa e Siasosi Fosi lea mea ua oo ia Naila. Ina ua falepuipui Naila, ona ia faia ai lea o sana anapogi umi. Peitai e le'i faamalamalamaina ai lona mafaufau, a ua atili faaletonu ai, ma aafia ai foi ma lona soifua maloloina.

Na asiasi Siasosi Fosi ia Naila, e le gata ina ia fesoasoani iai, ae faitio foi iai i mea o ia faia ma le faamoemoe o Siasosi o le a suia ai Naila ma ta'ita'ieseina mai ai mai le mea o loo iai. Ae lei talia e Naila

le taumafaiga a Siasosi. Ina ua alu atu Siasosi e faamavae ia Naila, na taumafai atu Naila e sogi atu ia Siasosi, ae liliu ese Siasosi. O se mea na taufai faanoanoa ai i la'ua uma e to'alua. Ina ua maua tala e tagata Quakers e uiga i lea mea, ona amata ai lea ona vevesi i latou, ma tau matemate pe o le a le mea a oo nei iai ona o lea ua eseese ma ua le faalelei o latou ta'ita'i.

Na faasa'olotoina Naila ina ua aumai se faatonuga mai le palemene e tatala Naila. Na manatu tagata o le a fo'ia ai le mataupu, ae leai, ua atili ai. O lenei lava e faifai mea faatasi ia Naila ma fafine nei e taumulimuli ia te ia. Ua ia talia fafine nei e latou te faatinoina se ata o le ulufale atu o Keriso i Ierusalem a ti'eti'e i le asini.

Ua Sasa, Faailoga, Tutui le Laulau

Na matua le malilie faamasino itumalo ma latou faatonuina le toe saisaia o Naila. E ui lava e le'i faamaonia e le faamasinoga nisi o moliaga na fai, ae na falepuipui lava Naila mo se taimi puupuu. Peitai na oo ina logotala le palemene i ni uiga e pei e tau faifai o Naila, ona latou manatu ai lea e tatau ona fai se mea ia Naila e avea ma lapata'iga i tagata lautele.

E le'i faasalaina i le oti ia Naila, *faaauau itulau e 7*

O LE LAUGA

ma tauvalaau; "Sole, sau ta tafafao, fia fai oe ma a'u uo," ae tali mai foi le tagata o loo i le mauga e fia fai au ma ana uo. Ona fai atu lea o le tamā; 'Atalii, o lou leo na e valaau ai, na na toe foi mai ia oe (O le echo)

Tatou fai atu se mea lelei, tatou te manao i isi e fai mai. Auā o le mea e tatou te faia i le isi, e fai mai foi e le isi ia tatou.

O le taua o le alofa atu ia moni, ina ia ola ai le isi uso, o le tagata e mana'omia le fesoasoani.

O le alofa lea na faia e Keriso, i lona maliu ma lona toetu manumalo, ina ia ola i tatou uma, i le ola e faavavau.

Manuia lenei vaiaso, i le feagai ai o nai fanau ma a'oga, faapea si a tatou aulotu atoa i le tagata lava ia, ma ona faamoemoga auā se manuia mo tatou uma. Tatou o pea

ma le faamaoni, aua ia ma ni toagafiti, e ono afaina ai nisi soifua. Ona o Iesu.

Saunia:

Tavita Pulu FS - EFKS Togo
Matagaluega Malua

CHURCH:

*The church that does not gather
into its fold the drunks, the
harlots, the liars and the thieves,
does not deserve the right to
welcome the saints
(Jack Coke)*

(George Fox: 1624-1691)

O SIAOSI FOSI

O LE NA IA FAASA'OLOTO LE AGAGA

mai le itulau e 6

a ua faatonuina ina ia savali i totonu o le aai a o faaoo atu ia te ia sasa e 210. Na tuiina foi lona laulau, ma susunuina se faailoga i lona muaulu. A ola mai ai mai ia faasalaga, ona toe fai foi lea i le isi aai o le a ia savalia. A ola mai ai i ia savaliga o aai e lua a o fai ona faasalaga, ona faasala ai lea i le loka i le potu na o ia, faaopoopo iai ma faasalaga o galuega mamafa, ma e le toe tatalaina i tua vagana ai se faatonuga mai le palemene.

Na ola mai o ia mai ia faasalaga uma. E ui lava ina tele ni talosaga mo lona faasa'olotoina, e le'i suia ai lava le faaiuga a le palemene. Faato'a talia lava e le palemene se talosaga ina ua avatu se talosaga faamomoi loto a lona to'alua. Ae o mea na talia e avatu o moliga'o, o le afi e faamafanafana ai le potu, ma meaai mo Naila.

Na salalau tala o faasalaga o fai ia Naila, e le gata ona o Naila o se tagata iloga, ae le taga i le tulafono faasalaga na fai ia ia.

Na gatete lagona o Kerisiano Quakers uma i le atunuu, ma latou vaavaai atu ai ia Siasosi Fosi. Ae le'i suia ai lava le talitonuga o Fosi, ma ia faaalua e na te matua teena uiga fou o faaalua e Naila. Ae toatele foi Quakers na latou tuua'ia Fosi ma fai mai e mamafa tele ana mea o fai faasaga ia Naila, ae sa tatau ona ia lavea'i mai le auauna mai ona mafatiaga. O le manatu o Fosi, ua ufitia le faatuatuga o tagata Quakers uma i se faafitauli ogaoga ona o Naila ma ona talitonuga, ma e ono lamatia ai le lumana'i o talitonuga o Quakers. E talitonu Fosi, o uiga le taofiofia

o Naila, ua pei o se po atu i fofoga o le Atua.

Sa ola lava Naila i le falepuipui se'ia oo ina toe fonu le palemene, lea na latou faasa'olotoina ai o ia. Ui i lea, e tolu masina faato'a feiloai Naila ma Fosi, ma faalelei ma fofo foi o la eseesega.

Ae ui lava i le tele o ona manu'anu'a na faamaasiasiina ai o ia, ma ta'uvaleaina ai foi, ae na ia maua le malosia ma le loto toa e toe susu'e ai se itulau fou, ma toe avea ma se tasi o ta'ita'i o Kerisiano Quakers. A o le suiga fou lea, ua faa'ofuina i lona faaaloalo faaleagaga ma lona auai malosia i le galuega, ma iloga ai lana galuega i vaega i tua atu o aai tetele o le atunuu, i lona loto maulalo.

A o le tau e afu ai laau o le tausaga e 1660 ma aga'i i le taumalulu, a o savali atu o ia i lona aiga, na osofa'ia ai o ia e nisi, ma maliu ai mai ona manu'a i le fale o se uso-a-Quaker e lata ane.

E ui lava o sauaga na fai aga'i ia Naila e solitulafono, ae sa faaauau pea ona falepuipui o Siasosi Fosi. E uma atu lea tausaga o falepuipui sosoo atu ma le isi tausaga toe fale puipui foi. Sa faapea foi ona tele taimi sa faafalepuipui ai Makerita Fele, faatasi ma lana fanau teine. O tala i le faafalepuipui e le uma, ae atili ai ona tupu tele le tapua'iga a Kerisiano Quakers ae le mate. E oo mai loa ni sauaga, ona vave faapotopoto lea o Kerisiano Quakers i se fale, poo se fale e teu ai meaai a manu, poo se falekamuta, poo se togalaau'aina, poo se malae. Sa faamalosi atu pea Fosi i Kerisiano ina ia faafetaia'i sauaga i le loto mau ma le filemu ma le

talitonu a tumau pea lo latou faatuatua ma le naunauta'i, o le a oo ina talepeina faigata e le mana o le Agaga Paia.

O le Mu Tele, o le Faama'i Pipisi, ma le Misiona

O se vai taimi o le 1660-1670 na amata ai ona ta'u e Fosi o ia o le "uso matua."

Ina ua mautu ona faavae o le Quakers ma ua iai foi ni ona ta'ita'i lelei i le lautele o le atunuu, ona see atu lea o le galuega a Fosi i le avea lea o ia ma faufautua ma o se tagata asiasi ma talia lelei i fonotaga a le auuso o loo fai e ni tagata e mafai lava e i latou ona fai e aunoa ma le faalagolago ia Fosi. E ui lava foi o loo faafalepuipuiina pea o ia mai lea taimi i lea taimi, ae sa tuputupu pea le galuega a le Alii e ala atu i lona tagata aua e le mafaia ona saisaia e ni poloka sima.

O se tasi o ona faafalepuipui, na faaali ai e le Atua ia te ia o le a iai se faama'i tele o le a faaumatia ai le toatele o tagata o Lonetona, faapea ma se afi tele o le a sosoo mai ai o le a mu ai le aai o Lonetona. O lea faaaliga na vaivai ai le loto o Fosi, faanoanoa ma tatalo mo tagata o le aai o Lonetona, ma lona mautinoa o le a matua toatele tagata o le a maliliu e aunoa ma lo latou iloa o Iesu Keriso. O le tausaga la e 1665 a o i le falepuipui o ia, na sasao ai le faama'i utufiti isumu i Lonetona. E afe ma afe tagata na maliliu ai. Ae ona o Fosi o le la ei le falepuipui, e le taumate o le mea lea na sao mai ai i le pipisi o le faama'i.

A o le aso na tatala ai mai le falepuipui ia Fosi, na amata ai foi ona sasao le Mu Tele o Lonetona. O le tele o fale o Lonetona na faaumatia - e pei o le Falesa o Sagato Paulo, e silia i le 80 falesa, o le fale tele o le fesuaiga o tupe ma fale o aiga e 13,000 na faaumatia uma i lea Mu Tele.

VERONIKA: le fafine na maua i le ma'i punatoto

mai le tusi:

The Day I Met Jesus

mai le itulau muamua

O le taimi e amata ai lenei tala, ae na o le sefulu iva tausaga o Iesu, ma o loo faigaluega i le fale kamuta o lona tama o Iosefa. E le'i amataina foi lana misiona i le vai taimi lea.

E latalata i Kapenauma, sa nofo ai se tagata e igoa ia Iairo, o se tamalii e mulimuli ane ona avea lea o ia ma peresitene o le sunako i le aai - o se tulaga e faaeaina ai le tagata. E iai se afafine laitiiti o Iairo i le taimi lea.

A o le vai taimi foi lea, i se isi aai, sa iai se fafine sa maua i se ma'i faigata, o le punatoto, o lea ma'i, o le a faaleagaina ai lona ola.

Sefulu ma le lua tausaga mulimuli ane, ua tupu olaola le misiona a Iesu i le 31 ai lea o ona tausaga. Sa femalaga'i o ia mai lea aai i lea aai, ma ia laugaina atu le tala lelei o le malo, ma faamalolo i ma'i.

O le taimi foi lea ua sefulu ma le lua tausaga o le afafine o Iairo, ae matua ma'i lava. A o le fafine ma'i punatoto, ua faateteleina lona ma'i.

O le afafine o Iairo, ma le fafine ma'i punatoto, na oo ina feiloa'i ma Iesu. Ma o lea feiloa'iga, na matua suia ai o la olaga i tausaga mulimuli ane.

O le lotu fou faato'a amatamata i ia uluai tausaga, na manatu e tatau ona iai se igoa o le fafine ma'i punatoto, ona latou faaigoaina ai lea o ia ia Veronika. Fai mai fo'i i

latou o Kaisareia i Filipi e sau ai. Pe moni pe le moni lea faaaliga, ae o le a tatou faaigoaina pea o ia ia Veronika.

O Iairo o se tagata lauiloa, o se tagata mautofi i le sunako, ma o se tamalii iloga i le sosaiete o tagata Iutaia i le uluai senituri. A o Veronika, e le iloa e se isi. E leai sona tulaga e leai foi sana galuega. Ona o lona ma'i, o le mea lea, e le maua ai fo'i o ia i le ma'i to, i ia tausaga uma e sefulu ma le lua. Ona o lona ma'i, afai foi na fai sa na tane, o lona uiga, e le'i to fo'i o ia i sana tamaitiiti, ma oo ina tete'a ai ma lona to'alua.

O le mea masani i le ulua'i senituri i Palesitina, o le fafine e le maua i le ma'i to, e faigofie ona tatalaina e lana tane le la faaiipoipoga. Afai foi o lana tane o se tagata lotu, e le mafai ona papa'i atu o ia i lana ava aua e le mama ai o ia i tu faale-atunuu. O lona le mama, e le mama ai foi isi tagata e papa'i atu o ia iai.

O taimi uma lava o lona punatoto, e na te fai ai taulaga i le ositaulaga mo lona faamamaina. O tagata uma na latou iloa Veronika ma lona ma'i, latou te le faalatalata iai. Se'i manatu ane la iai - e sa ona ia papa'i atu i se tagata; pe fusi atu iai; pe faaali iai sona alofa; a ua faanofoeseina mai sauniga uma.

I nei tausaga e sefulu ma le lua!

E le gata i lea, ua matua mativa, ona ua uma ana tupe i le totogiina

o foma'i. I le ma lea, o le le fanau, o se masiasi tuga i le ulua'i senituri i le nuu o Palesitina ona e manatu tagata o se faasalaga mai le Atua. O le mea lea e matua mafatia ai lava le tagata e le fanau, le tagata ua tete'a ma le to'alua; ma le tagata e faifai pea lona le mama ona o lona ma'i punatoto.

O le mafuaaga lea o lona naunauta'iga e saili ia Iesu ina ua ia faalogo i tala ia te ia. O le mafuaaga foi lea o lona tetemu ina ua ia papa'i atu faalilolilo i le ofu talaloa o le Alii, ma toe taumafai e lafi, ae fetalai le Alii: "O ai na pa'i mai ia te a'u?" O ia o le fafine le mama ona o lona ma'i, ua papa'i atu i le tagata pa'ia, ma ua le mama ai le tagata.

Peitai, ioe, peitai, o le ituaiga tagata e iai Veronika, o le ituaiga tagata lea e fiafia Iesu e fesoasoani iai.

O le Faatuatua e tuu Faafeagai ma le Mana o le Atua

Na matua suia atoa le tulaga sa iai Veronika ina ua ia faalogo i tala e uiga ia Iesu. (Mareko 5:27-34): "Ua faalogo o ia ia Iesu, ona alu ane lea i ona tua, i totonu lava o le motu o tagata, ua pa'i ane i lona ofu; aua ua faapea o ia, "Afai ou te pa'i atu tau lava o ona ofu, ona ou malolo ai lea." Ona utu loa lea o lona punatoto; ona iloa lea e ia lona tino ua faamaloloina i lona ma'i tiga. Ua silafia loa e Iesu i lona lava finagalo, ua alu atu le mana nai ia te ia, ona faliu lea o ia i le motu o tagata, ua faapea atu, "Poo ai ea na pa'i mai i o'u ofu?" Ona fai mai lea o ona soo ia te ia, "Ua e silafia le motu o tagata, o loo fetaomi mai i latou ia te oe, ae te fetalai mai ea, Poo ai na pa'i mai ia te au?" Ua silasila solo foi o ia ina ia silafia le na faia lea mea. A o le fafine, ua mata'u ma gatete, ua na iloa le mea ua na faia ia te ia, ua sau ma faapa'u o ia i ona luma, ma ta'utino atu le tonu ia te ia. Aua fetalai atu ia ia te ia, "Lo'u faaauau itulau e 9

VERONIKA: le fafine na maua i le ma'i punatoto

mai le tusi:

The Day I Met Jesus

mai le itulau e 8

afafine e, o lou faatuatua ua e malolo ai; ina alu ia oe ma le manuia, ma ia e malolo i lou ma'i tiga.

O le tulaga leaga sa iai Veronika na matua suia atoa ina ua "faalogo i tala ia Iesu."

Tatou te manatua upu a Paulo i lana tusi ia Roma 10:17: O lenei, e tupu le faatuatua i le taulogologo atu, o le taulogologo atu foi o i le afioga a le Keriso lea.

O tala e uiga ia Iesu na mumu a'e ai le faatuatua i le loto o Veronika. Pe o le a lava le mea na tupu i lagona o Veronika, ae na ia talitonu, tau lava ina ia pa'i atu i ofu o Iesu, o le a faamaloloina ai o ia. Ma o le mea lava lea na ia faia, i luga o le faatuatua e ono fesiligia ma amusia e tagata.

Fai mai nisi tagata popoto, o lona pa'i atu i ofu o le Alii, e iloa ai e talitonu o ia i mea faataulaitu, faapea o le pa'i atu i ofu o le Alii, o le a tupu ai se mea faamaneta. Ae ou te le manatu sa iai sona talitonuga faapea. Ona o le pa'i atu i le tuupao o le ofu o se tagata iloga i tu faa-atunuu i sasa'e tutotonu, o le faaaliga lea o se naunauta'iga malosi, poo se moomooga vilivilita'i. Na ia lagona foi o le a le mama Iesu pe a papa'i atu o ia ia te ia, na mafaufau ai foi e faapea, o le papa'i atu i le pito 'ofu, e laitiiti se leaga e tupu mai ai, ma mafai ai foi ona ia sola

ese e aunoa ma le maua o ia.

Matau mai, e le'i pa'i atu Veronika i le pito o le 'ofu e lata i seevae, aua e faigata lea ona o le fetaomi mai o le motu o tagata. O le pito 'ofu o ta'ua, o le pito o le solo poo se pulupulu e lafo i luga o le tau'au agavale ma tautau i tua. O le pulupulu lea o se faamanatu i le tagata Iutaia o tulafono a le Atua.

O le faamaoniga o le faatuatua o Veronika e faamaonia lea i le mea moni, na ia iloa lelei lava e ono tupu se mea ia te ia pe a papa'i atu ia Iesu. E iai se mea e tupu ona o lona "papa'i atu". O lona faaleagaina lea o se tagata pa'ia ona o lona ma'i. O le a ia faaleagaina foi soo se tagata e papa'i atu iai i le motu o tagata. O le a le mama uma ia tagata ona o lona papa'i atu ia i latou.

Matau mai. O Le na papa'i atu i lepele ma tino oti o tagata, e le'i fefe pe popole ne'i 'ele'elea ma palapala ona lima i faafitauli o le lalolagi agasala.

E lua mafuaaga na ta'ua e Iesu na mafua ai ona faamaloloina Veronika:

1. O le mana o le Atua - Mareko 5: 30.
2. O le faatuatua o Veronika - Mareko 5:34.

O le mea ofoofogia, e le'i mafai e Iesu ona fai ni vavega i lona lava nuu o Nasareta ona o le ogaoga o le le talitonu o tagata - Mareko 6:5.

E manatu le toatele o tagata o le

faatuatua o se mea tau i le mafaufau. E le o se faamoemoe foi. O le faatuatua o se ituaiga talitonu i le Atua e tupu a'e i sou malamalama i totonu ia te oe. O le mea lea na tusi ai Paulo: O le faatuatua e tupu i le faalogo, ma o le faalogo i le afioga a le Atua. O le faatuatua o le ala lea e mafai ai e le mana o Iesu ona galue. O le mea lea e fai mai ai Iesu o le faamaloloina ma vavega e mafua mai i le faatuatua o le tagata i le isi itu (Mareko 10:52; Luka 7:50; 8:12,48; 17:19; 18:42; Galuega 15:11) ma le mana o le Atua i le isi itu. (Luka 5:17; 8:46)

O le Afafine o le Tupu

Na feo'ai lava le mea na fai e le fafine i lona faatuatua, ma Iesu, ma mafua ai ona ia tuufesili, "O ai na papa'i mai ia te au?" Na finagalo lava o ia ina ia toso mai i le moa o le malae le fafine ina ia ia molimau i le faamalologa ua ia maua.

E matua taua le itu lenei - na o Veronika le fafine ua ia faalagi i le upu: "Afafine"

Aisea ua ta'u ai e Iesu ia Veronika o le "afafine"? Pe o le mea na musumusua e le Tama lona Atalii, e pei ona tupu soo? O le fafine lenei na faatulaga mai lava talu ona faavaeina le lalolagi o le a avea ma teineitiiti a le Atua soifua. Ma e na faamaonia e Iesu i luma o le motu o tagata. O upu na fetalai ai Iesu ua avea ai o ia ma aiga o le Tupu. E le gata la ua ia toe faafo'i Veronika i lona si'osi'omaga i lona nuu, a ua ia faaulufale mai o ia i le mafutaga pa'ia.

Na faaauau ona fetalai o Iesu, "O lou faatuatua ua e malolo ai. Ina alu ia oe ma le manuia, ma ia e malolo mai lou ma'i tiga." E sefulu ma le lua tausaga o mafatia Veronika mai lona puna toto. A o lenei ua utu. Ua mapu! O le mea na le mafai e foma'i, ua faia e le Foma'i o foma'i. Ua faia e le Atua Soifua.

FA'ASOLOGA FONO TELE 2017

MALUA, ASO 15 - 26 ME

"FAALOGO I LE AGAGA O LE ATUA"

"Listen to the Spirit of God"

(Faaaliga 1 : 10)

<u>ASO</u>	<u>TAIMI</u>	<u>FONO & SAUNIGA</u>	<u>NOFOAGA</u>
ASO GAFUA 15/05/17	7.00am	Asiasiga Komiti Atinae	
	10.00am	Komiti Mataupu Tau le Aufaigaluega	Fale Mafutaga
	1.00pm	Fono Komiti o Atinae	Fale Senetenari
	7.00pm	Lotu Talosaga Au Toeaina <i>Taitai: Siolo Tauati FT</i>	Iupeli <i>Apia</i>
ASO LUA 16/05/17	8.00am	Komiti Au Toeaina Komiti o Aoga	Fale Mafutaga Fale Senetenari
	9.00am	Faletua Au Toeaina	Fale o Tina
	7.00pm	Komiti Faamisionare	Fale Mafutaga
ASO LULU 17/05/17	8.00am	Komiti o Feau Eseese Komiti Au Taumafai Komiti o Tupe	Fale Senetenari Fale Mafutaga Fale Fono
	9.00am	TPT: Tautua Puapuaga o Tagata	Fale o Tina
	2.00pm	Komiti o Feau Eseese	Fale Senetenari
	7.00pm	Lotu Au Taumafai <i>Taitai: Iakopo Leleimalefaga FS</i>	Iupeli <i>Niusaelese</i>
ASO TOFI 18/05/17	8.00am	Komiti o Tupe Komiti Au Leoleo	Fale Senetenari Fale Mafutaga
	9.00am	Lotu Mafutaga Tina	Fale o Tina
	1.30pm	TPT: Teine Papauta Tuai	Fale o Tina
	7.00pm	Lotu o Nu'u Ese <i>Taitai: Nove Vilaau FS</i>	Iupeli <i>Niu Sila i Saute</i>
ASO FARAILE 19/05/17	5.00am	Lotu Au Leoleo <i>Taitai: Paul Grey FT</i>	Iupeli <i>Vitoria</i>
	9.00am	Mafutaga Tina Komiti o Tupe	Fale o Tina Fale Senetenari
	2.00pm	Komiti o Tupe	Fale Senetenari
	7.00pm	Fono Malua Tuai	Fale Mafutaga
ASO TOONAI 20/05/17	9.00am	SAUNIGA O LE FAAUGA <i>Taitai: Tavita Anesone FT</i> <i>Faitau Tusi Paia: Tavaaga Mataafa FT</i> <i>Tatalo: Leaso Tupai FT</i> <i>Faaeelima: Liki Tiatia FT</i> <i>Malifa T. Malifa FT</i> <i>Tautiaga Senara FT</i> <i>Tavita Anesone FT</i> <i>Lucky Slade FT</i> <i>Iosefa Uilelea FT</i> <i>Tuuina atu Aoao: Tunumoso S. Iosia FT</i>	Iupeli <i>Taitaifono KAT</i> <i>Kuiniselani Saute</i> <i>Faasaleleaga</i> <i>Amerika</i> <i>Niusaelese</i> <i>Aana</i> <i>Faleata</i> <i>Aukilani</i> <i>L-L-Aleipata</i> <i>Failautusi KAT</i>
	2.00pm	Lotu mo Tupulaga <i>Taitai: Osa Nanai FS</i>	Iupeli <i>Kuiniselani</i>
	7.00pm	TUFA FAILA A USUFONO	Fale Fono
ASO SA 21/05/17	9.00am	LOTUTAEAO/FAAMANATUGA <i>Taitai: Liki Tiatia FT</i>	Iupeli <i>Amerika</i>
		LOTU AFIAFI	Iupeli

6.00pm	Taitai: <i>Aofaiga Levi FS</i>	Kuiniselani Saute
	LOTU AFIAFI	Fale o Tina
	Taitai: <i>Eti Tamati FT Malua</i>	
	LOTU AFIAFI	Fale o Tina
	Taitai: <i>Eteuati Reupena FS</i>	Apia

22 - 26, USUIA LE FONOTELE

ASO GAFUA 22/05/17	7.45am	Tapuaiga Amata	
		Taitai: <i>Tautiaga Senara FT</i>	(Taitaifono)
	8.00am	Pepa: <i>(Kolisi Faafaipeau Malua)</i>	
	9.00am	Amata Taulumaga o le Fono Tele.	
	12.00pm	Malologa mo Taumafataga o le Aoauli.	
	2.30pm	Faaauau Taulumaga o le Fono.	
	5.30pm	Malolo le Fono	
ASO LUA 23/05/17	7.45am	Tapuaiga Amata	
		Taitai: <i>Maligi Evile FT</i>	(Penisione)
	8.00am	Pepa: <i>Faatulituli Setu FT</i>	(Au Toeaina)
	9.00am	Taulumaga o le Fono Tele.	
	12.00pm	Malologa mo Taumafataga o le aoauli.	
	2.30pm	Faaauau Taulumaga o le Fono	
	5.30pm	Malolo le Fono	
	7.30pm	Pesepesega/Siva Faaleagaga:	(Autalavou EFKS Nuufou)
ASO LULU 24/05/17	7.45am	Tapuaiga Amata	
		Taitai: <i>Otele Perelini FS</i>	(Penisione)
	8.00am	Pepa:	(Mafutaga Tina)
	9.00am	Taulumaga o le Fono Tele	
	11.00am	SAUNIGA ALOAIAAU PENISIONE	(Iupeli)
		Taitai: <i>Tautiaga Senara FT</i>	(Taitaifono)
	2.30pm	Faaauau Taulumaga o le Fono.	
	5.30pm	Malolo le Fono.	
	7.30pm	Pesepesega & Tala Faaleagaga:	(Autalavou EFKS Auala)
ASO TOFI 25/05/17	7.45am	Tapuaiga Amata	
		Taitai: <i>Kerisiano Soti FT</i>	(Penisione)
	8.00am	Pepa: <i>Mataia Apisaloma TT</i>	(Faleata)
	9.00am	Taulumaga o le Fono Tele	
	12.00pm	Malolo mo Taumafataga o le aoauli	
	2.30pm	Faaauau taulumaga o le Fono	
	5.30pm	Malolo le Fono	
	7.30pm	Feiloaiga Au Toeaina & Aufaigaluega Faifeau	
ASO FARAILE 26/05/17	7.45am	Tapuaiga Amata	
		Taitai: <i>Tunumoso Soliola Iosia FT</i>	(Taitaifono)
	8.00am	Pepa: <i>Tupulaga Talavou</i>	(Ituotane)
	9.00am	Taulumaga o le Fono Tele	

TAUALUMAGA O LE FA'ASOLOGA O LE FONOTELE:

- 1 Faamaonia Iugafono Fono Tele
- 2 Faamaonia Iloiloga Faavae 2016
- 3 Mau Tuu Sao mai Matagaluega
- 4 Mau Tuu Sao mai Komiti Tetele e Ono a le Ekalesia
- 5 Faamaonia Galuega a Komiti
 - i. Komiti o Tupe
 - ii. Komiti o Feau Eseese
 - iii. Komiti o Aoga
 - iv. Komiti o Atinae
 - v. Komiti Faamisionare
 - vi. Komiti Au Toea'ina
- 6 Palota Sui Taitaifono

FAILAUTUSI

O le Teineitiiti ma le Ta'ita'i'au Fiatagata

O le Tala i le Teineitiiti Pologa ma Naamanu - 2 Tupu 5

O Naamanu o se tagata matua taua, i se autau matua logologoa, i se atunuu e matua lauiloa i le lalolagi atoa o na aso. E te silafia ai lava, o Naamanu o se tagata e matua taua tele.

Peita'i, e ma'i! O le ma'i lepela, o se ma'i e te le lagona ai nisi o ou itutino. E tele foi ina to'ulu ese nisi o vaega o lou tino, e pei o tamatama'i lima ma tamatama'i vae.

E leai se fofo o lenei ma'i i aso anamua. E le alu ese ma le tagata pe a maua ai. O le ma'i foi e leai se fofo i la tausaga anamua. E oo lava ina oti ai le tagata. A o Naamanu lea ua maua ai, o se tagata taua. E tatau ona saili i o ma o se togafiti mo ia.

Ae sa iai se teineitiiti sa faigaluega mo Naamanu, ma e iloa e le teineitiiti le tagata e mafai ona

fo'ia le ma'i o Naamanu. Ae o le faafitauli, o Naamanu o lona fili.

E le'i umi se taimi ua te'a atu, na ta'ita'iina ai e Naamanu se autau ma na osofa'ia ai lona nuu o Isaraelu. Na ia fasiotia ai lona aiga uma, ma na aveina o ia i Suria, ma fai le teineitiiti ma ana pologa. O po uma lava la, e moe ai ma tagi le teineitiiti i le alofa i lona aiga, misia nai ona matua, ma nai ona tei. Ua ia misia tagata e alolofa ia te ia.

Aisea e fia fesoasoani ai ia Naamanu? E le o ita i le ta'ita'i'au ma fia tau ma sui iai? Ia, o o tatou lagona na. Peitai, o lagona o le teineitiiti, e alofa ia Naamanu ma le ma'i leaga o loo maua ai. O le ma'i lepela! O mafatiaga o maua ai Naamanu, na oso ai lona alofa i le tamalao, ma faamagalo iai i lona fasiotia o lona aiga uma. Ioe! Faamagalo iai.

"Ou te mana'o ina ia toe malosi Naamanu." O le tala lea a le

teineitiiti i le fafine e pule ia te ia. "Ma e iai le tagata i Isaraelu e igoa ia Elisaia e mafai ona ia faamalolo Naamanu mai lona ma'i."

Fai mai Naamanu, "Ia o le a ou alu iai." O le tala lea a Naamanu. "Ae ou te alu i le maota o le tupu aua o iina e faamaloloina ai tagata taua e pei o a'u." Ona faagutu ai lea o lana taavale solofanua, ma fai ona ofu ta'ita'i'au o le fitafita e faaali ai o ia o se tagata maualuga ma le taua.

Ona alu sa'o ai lava lea i le tupu o Isaraelu. "Fofu a'u! Faamalolo a'u mai le ma'i." O uiga faamaualuga lava nei ua faaali atu i le tupu o Isaraelu.

Ae fai mai le saunoaga a le tupu, "E tele mea ou te mafai ona fai, ae na o le Atua e mafai ona ia faamaloloina se ma'i."

O le taimi lea na taunuu atu ai se

faaauau itulau e 15

O Mataupu Ogaoga

mai le itulau muamua

manatu o sea faafitauli o se avanoa e faasusulu ai le malamalama i le alofa tunoa o le Atua, faapea ma lona mamalu, ia faailoa ai le Atua, i taimi o ia faia ai avanoa ina ia mautinoa ai e tagata o lo latou pa'u'u ona o le agasala ia ave ma mea e 'ina'ina ai ma tausani mo lana faamagaloga, ma lona fesoasoani mai e ala ia Keriso?

E le taumate lava o se vaega lea o le mea o ta'ua e le Alii i ona soo i le Mareko 13 a o latou talatalanoa i mea o faagasolo mai o le olaga. O ia aso faigata o le a faati'eti'e ai i latou i tulaga mata'utia. O le a

tofotofoina i latou ina ia fefefe. O tagata foi o latou tausani ma fesoasoani iai o le a sauaina ma o le a puapuagatia. A o le mea taua o le "molimau" pe o ai le Atua ma pe o le a lava le mea o fai mai ai lana Afioga o le mea lea e sa'o (f.9). O le mea e sili ona taua o le faaaogaina lea o le avanoa e alagaina ai le upu moni faapea lona malo e faavavau. O le mea lea e sili ona taua.

E le taumate o le a e manatu e te le gafatia lea lu'itau, pe e te le agavaa, pe e te le iloa foi ona tautala atu e uiga i le Afioga a le Atua, pe le o ia te oe foi le loto toa

e te talatalanoa atu ai i isi tagata e uiga i le alofa ma le agalelei o Keriso. A ia e manatua le au soo lea e talanoa iai le Alii. E le'i lelei ni a latou a'oga. E le lelei foi ni o latou aiga. A o ni tagatanuu lautele masani lava. O tagata leipa. Ae na filifilia i latou e le Atua, ma faatutumuina i latou i le Agaga Pa'ia, ma auina atu i latou i le lalolagi ua matua faaau'upegaina i le mea moni, ma o le mea lea, na oo lava i le malo aupito malosi o Roma, e le'i mafai ona ia taofiofia.

O le mea lea, tusa lava pe o le a se malosi oi ia te oe, pe leai foi se malosi, ia e manatua, e iai se fe'au a le Atua mo oe e tatau ona e faia i nei taimi faigata. O se feau e tatau ona e olaina, ma e folafolaina ma tala'i atu le Tala Lelei ia Keriso.

O E UA FAI I LAGI LE FOLAUGA

**Emily Lina
Hansell(nee Bryce)**
29 Tesema-1926-23 Me-2015

O lona tama o Stanley Tarigi Bryce a o lona tina o Mele Ah Cheong Fong.

Na faaiipoipo ia Seiuli Hoe Hansell, ma ua taufai matutua o la soifua pei ona maliu o le tina toetoe lava atoa le ivasefulu tausaga lona matua.

E to'asefulu ma le fa le fanau ma le anoanoa'i o i latou na tutupu mai i le tina e le mafaitaulia le toatele po ua silia lava ma le selau tagata.

O i la'ua isi o sui faavae o le aulotu nei i le 1980, ae le'i fou ia i laua le lotu, ona na aulotu i le EFKS i Alamagoto ma le EFKS i Sinamoga a o le'i maua lo latou nofoaga tumau ua alala ai nei i Tulaele nei. O le uluai tiakono o le aulotu nei ona e fai le lotu o la umia le tofi tiakono mai Sinamoga.

Ma te taunuu mai i le 1985, o

feagai le tina o Emele (Emily) ma le tausiga o 'ie o le falesa mo le pulelaa ma le la'o'ai. O ia foi na feagai ma le saunia o le areto ma le uaina o le Faamanatuga i Aso Sa o lenei sauniga. O se tina mataala ma le galue faamaoni i ona tiute faa-tina, aemaise le faamaopopo i le galuega i le Mafutaga a Tina.

O se vai taimi o le 1970 na aafia ai le tama o le aiga i se gasegase faigata o le stroke, na toe alofagia e le Atua a ua le atoa lava le malosi e galue ai, a o le mamafa o le aiga ma le faatinoga o le la tofi i le Ekalesia na feagai ma le tina. O le 1989 na malaga ai ma le tama ma nofo mau i Niu Sila, ona saunia ai lea e tina i se faasologa le Areto ma le Uaina ma tausi faatasi ai Ie o le Falesa.

E ui ina malaga ae na faaauu le matafale e le fanau aemaise o Peter ma Daisy Roebeck. O le 2012 na toe foi mai ai ina ua mae'a ona fai lo la maota fou ma nofo mau ona ua matutua seia maliu le

to'a sefulu ma le toalua o la alo. (5 teine 7 tama). O fanau a fanau e to'a 40. Sa fai ma ta'ita'i o 'Au a Tama i tausaga o iai lea faalapopotoga i le Ekalesia.

E taunuu mai i Lotofaga (1989), e to'alua ia i la'ua matafale taulele'a, o galulue i le aulotu. O le tofiga a le Pulega a Lepa ma Lotofaga na faia i Lepa, (19 Ianuari 1994) na faaetia ai i lo la tofi tiakono. O le Fono Tele i Malua (2002), na maua ai lona tusi faamaoni o le A'oa'o Fesoasoani. Na galulue ai loa, seia faamanava e le Atua ana galuega i le ola nei.

Na filifilia e le aulotu e fai ma komiti (1998-2002, Sa fai ma taitaipese i le tele o tausaga O se tagata siufofoga lelei o le usu pese i le aulotu, nuu ma le pulega. Filifilia o le peresetene ma Sui Peresitene o

tina a o loo soifua pea le tama.

E to'aga ma fiafia e auai i sauniga lotu, aemaise le tautua malosi i le Ekalesia e le suia. E tausaaafia ma galue le leoa i se soifuaga faamaoni ma le faatuatua i lona Alii.

O ona toe sauniga na faia lava i le malumalu i Tulaele i le aso 30 Me 2015. Na ou ta'ita'i ma momoli mai i totonu le tina mo lona sauniga. Faitau Tusi Paia Tuigamala A. Liu AF, tatalo Sauleone Tanoi FS, lauga Iosefa Afutiti FS. Na saunia pese e le aufaipese lava a le EFKS Tulaele. Na molimau Seiuli Otto Hansell, Joseph Hansell, e fai ma sui o le tama, fanau ma aiga, ae faaii i la'u molimau i le soifua faale-agaga.

Na auai foi i lenei sauniga le Afioga i le Ao Mamalu o le Malo, Tupua Tamasese Efi ma le Masiofo Filifilia Tupua Tamasese, ma le Afioga ia Bishop Winston Halapua o le Ekalesia Egelani. Ona faaii lea i lona nofoaga mau i lona aiga i Tulaele i le sauniga na ou taitaiina ma faatofa ai i le tina i le pese a le Au Kerisiano e 268 - Tofa! Tofa! Tofa!. Ia faamanuina ma viia le Suafa o le Atua ona o lenei tina.

Faauga Mata'utia FT,
EFKS Tulaele.

**Seinafolava Akerei
Seinafolava**
15 Setema 1946-12 Novema
2016

O le A'oa'o Fesoasoani. Na soifua mai i le aso 15 Setema 1946 i Lotofaga. O ona matua o Seinafolava Sofara (tama - Lotofaga), ma Fiapa'ipa'i (tina - Lufilufi).

E toa lima ona tuafafine, ma uso e to'afa. Na a'oa'o ina i le a'oga a le faifeau (Enosa ma Mutaaga) i Lotofaga, le a'oga tulagalua i Lotofaga; ma le A'oga Itumalo i Lalomanu.

Na faaiipoipo atu ia Talaogafa Tuuga Epa o Sapunaoa (Enosa Toloa FT). E

le Au Talavou (2000-2006. O le taimi foi lea o ia o se faiaoga o le A'oga Aso Sa. Na filifilia e le Matagaluega a Falealili i Sasa'e, e fai ma sui tiakono i le Komiti A'oga mo le tolu tausaga.

Na ia te ia le faatuatuga a ona aiga, ma filifilia ai e ona aiga i Lotofaga i le suafa Seinafolava, Paivao ma Aiomanu, a o le aiga i Lufilufi i le suafa Poloai ma Afolautifa. O ia lava o se faiaoga o le aganuu. E le se matai e taofiofi mamau, ae fiafia e faaso atu. E ui lava ina tele ona tiute i le tausiga o aiga, nuu ma le itumalo, ae le'i faatamala ai, i le faatinoga o ona nafa faale-Ekalesia, aemaise lona valaauina o se A'oa'o Fesoasoani. O le upu moni, o ia lava o le auuuna a le Atua. O ia o se faiaoga o le onosa'i, faapalepale, le gaoia, loto mau ma le alofa. O lana faaauu itulau e 16

O E UA FAI I LAGI LE FOLAUGA

**Ugapo L. Pusi
Ulale AF**

5 Tesema 1933-10 Me 2013

O ona matua o Nafotoa Ulale Tupu le tama mai Fagamalo, a o lona tina o Sima A'e'au mai Falealupo.

Na faaiipoipo ia Elizabeth (Peka) Matthes, maua ai le fanau e to'aiva. Na a'oa'oina i le Felela Malisi 1939-1953, ma faaiu ai i se avanoa faa-sikolasii i Niu Sila i le 1954-1957. O se faiaoga ma se pule aoga iloga i lana tautua i alo o le atunuu i tausaga e tele. Na faaiu lana auaunaga i le malo i le avea ma failautusi a le Afioga i le Alii Palemia i le 1990-2000.

O se sui faavae o le aulotu nei i le 1980. Faa-ekalesiaina - 2 Aokuso 1987. Fai ma tiakono i le aso 2 Aokuso 1989. Avea ma A'oa'o Fesoasoani i le 1992. Na fai ma taitaifono a le aulotu i le 1995 ae avea ma sui taitaifono mai le 2000-2005. Na fai ma taitai pese i le 1999. Na avea ma usufono i le Fono Tele i le 1992 o se tiakono, ae usufono o le A'oa'o Fesoasoani i le 1997.

O se auauna loto fesoasoani ma le lagolago i le galuega ma galue tauivi ma faamalosi i le malosai mai le Atua i toe vaega na totoe o lona soifua. O se fiafiaga i lona lotu ina ua valaauina e le Atua se tasi o le fanau mo lana galuega, le Susuga i le faifeau o Lance Ugapo Ulale FS o loo galulue ma lona faletua o Freida Ugapo i le EFKS i Saaga Siumu.

O lona toe sauniga na faia i le malumalu i Tula'ele i le aso 27 Me 2013. Na auai faifeau ma faletua o le pulega a Faleata i Sisifo, aemaise le toatele o le aufaigaluega ma faletua, o paolo ma aiga e fia faapea uo ma aumeamamae. Na ou ta'ita'i ma momoli i totonu le tama mo lona sauniga i le

malumalu e le Susuga i le faifeau ia Tautua Aurelio FS. Na faitau le Tusi Paia e le Susuga ia Reupena Nofoaiga FS, tatalo le Susuga ia Iosefa Afutiti FS ae lauga le Susuga Dr. Eletise Suluvale FS.

Na molimau lona uso ma le

**Elizabeth (Peka)
Matthes Ugapo Ulale
16 Ianuari 1932-18 Septem-
ber 2014**

O le faletua o le A'oa'o Fesoasoani o le EFKS i Tulaele. O ona matua o Alfred Matthes le tama, a o Pila Matai'a Nonumalo le tina.

E to'aiva lana fanau ma le anoano o isi na tutupu mai i le tina i fanau a lana fanau. Poo le 1986 na faato'a faaiipoipo ai faaletulafono ma le Susuga Ugapo Ulale ui ua leva ona faatasi i laua. O se fiafiaga i le tina ina ua faaofia o ia i le Ekalesia ma pale ma lona alii i nisi tofiga e pei o le fai ma tiakono, A'oa'o Fesoasoani ma nisi na tautua ai mo le Alii.

Na fai ma tagata o le Ekalesia i le aso 22 Me 1987. Na fai i laua ma le tama ma tiakono i le aso 2 Aokuso 1989. Na avea i laua e tautua i le tofi A'oa'o Fesoasoani i le tausaga e 1992 seia valaau le Alii i le tama.

Na iai i le faavaeina o le aulotu i Tulaele i le 1980. O se tina tausaaafia i ona uiga malie i le Mafutaga a le Au Uso i le Ekalesia. E galue fiafia ma taumafai i le mea e gata ai lona mafai. Na ia auai ma auauna i le Mafutaga a Tina e faapea i le Aufaipese. O se mea fiafia i le tina ina ua valaau le Atua i se tasi o lana fanau e tala'i le Tala Lelei, le Susuga Lance Ugapo Ulale FS ma le faletua o Freida, o loo galulue i le EFKS i Saaga

fanau, Dr Lea'ana Lance Eves ae faaiu i la'u molimau i lona soifua faale-agaga.

Na usuina pese o lenei sauniga e le aufaipese lava na ia auauna ai i Tulaele. Ma faaiu lona sauniga i lona oliolisaga tumau na ou ta'ita'iina ma faamavae atu ai i le uso ma le tama ia Keriso i le pese faatofa a le au Kerisiano e 268. Tofa! Tofa! Tofa!

Ia faamanuina pea le Suafa o le Atua i le soifua o lana auauna.

Faauga Mata'utia FT,
EFKS Tulaele

Siumu. E faamaopoopo ma tauivi mo le manuia o le Ekalesia.

Na faia lona toe sauniga i le aso 25 Tesema 2014 i le malumalu i Tulaele nei. O lona toe sauniga na ou ta'ita'i ma momoli i totonu, o le Susuga a Iosefa Afutiti FS na faitauina le Tusi Paia ma le tatalo. A o le Susuga i le Faifeau Toeaina o le Pulega a Safata ma Siumu ia Kereta Fuafiva FT, na saunia le lauga mo se faamafanafanaga i fanau ma aiga aemaise lenei Ekalesia ma e uma na auai. O pese na usuina lava e le aufaipese a Tulaele. A o molimau o lona uso, o lona tuagane ma le fanau ae faaiu i la'u molimau faale-agaga.

Na faaiu i lona sauniga i lona oliolisaga tumau na ou taitaina ma faatofa atu ai ia te ia i le pese a le au Kerisiano e 268. Tofa! Tofa! Tofa!

Ia saga viia pea le Suafa o le Alii i le soifua faaogina o lana auauna.

Faauga Mata'utia FT,
EFKS Tulaele.

O le Talosaga

E talosaga atu i le paia o le aufaigaluega a le Atua, ina ia momoli mai i le Ofisa o le Sulu tala o faaulufalega ma umusaga o malumalu ma maota o faifeau, e tusi ai e le Faatonu se tala mo le tatou Sulu. Tala ia e fofogaina e le ta'ita'i tufuga poo le faafeagaiga foi i le taimi o le sauniga o le faapa'iaga.

Faafetai tele.

O E UA FAI I LAGI LE FOLAUGA

**Tuiena Galuo Tutonu
Niumata Galuo Fisi
8 Iuni 1927-25 Mati 2015**

Matua: (Tamā) Niumata Galuō Fisi(Tinā) Foloi Euga Malakai Na fa'aipoipo ia Titimanu Laloua Matautia Povita po'o le tausaga 1950, ae na maliu 04/06/1992.

Na ou faalogo foi i le leo mai le lagi, ua faapea mai ia te a'u, "Ia e tusi, Amuia ē ua oti, o ē ua oti oi le Alii e amata i nei ona po." O lea lava ua fetalai mai ai le Agaga, 'ina ia latou malolo ia latou galuega tigā, auā foi o a latou galuega e mulimuli ia te i latou?" [Faaaliga 14.13]

O le tofā ia Tuiena Tutonu na faatiakonoina i laua ma Titimanu i le 1960. Na amata galue o ia i Komiti a le aulotu mai le 1970 seia o'o lava ina le toe atoatoa lona malosi 2008. O lona uiga, e 38 tausaga o komiti. Na o le pau lea o le tiakono na galue i komiti uma lava a le aulotu, ae maise ai lava i le komiti o le fanua i uta, komiti o Taulaga, ma le komiti o le Alofa o le Faifeau.

I le tauaveina o nei tofi, o ia lava sa tausolomua i le faatinoina ma le faaleleia o nei matagaluega. Pe afai foi e fai se fatusatusaga, e tulaga ese lava ma maoa'e le auaunaga le tautua ma le faatinoga o le soifua ofoina atu o lenei tamā i totonu o le aulotu.

E umi se taimi o nofo to'atasi le tiakono, ae le'i faoa ai lava lona tausolomua fai mea mafai, tu malosi ma alofa i le aulotu. O ia lava sa faaleleia mea uma i le fetai'iga a le pulega i ana mea fai, sa to'aga foi e tausi le faifeau, ma puipui i le maota ma le fale o le faifeau.

O ona toe sauniga sa faataunuaina i le Aso Toonai 04 Mati 2015, i le malumalu EFKS Vaipua, o le mea sa galue ma auauna ai mo le Alii. O a'u sa ta'ita'i ma saunia talosaga. O le susuga ia Fatu Fetu (Faifeau Metotisi) sa faaulufaleina

lona sa, o ia foi sa saunia le upu faamafanafana.

O Loli Malakai ma Mautagatamua Talosaga sa fai ma sui o le fanau e molimau i le soifua o le tama. O Loli Ioane ma le Susuga ia Faapaia Tariu (FS) sa fai ma sui o aiga o le toaina. O Loli Vaatausili sa fai ma sui o le nuu e molimau i le soifua tautua o le tulafale matua. O a'u sa faia le molimau faaleagaga. O le afioga i le tiakono, o le toe ulutaia o lenei aulotu.

O ana galuega lelei e fa'aauauina e ona alo ma a latou fanau, o e oi Samoa nei faapea foi atunuu e mamao. O Loli Seanoa &

Susi, o Mautagata Talosaga & Lesaia, o tiakono ia i lenei aulotu. O Loli Malakai & Ruta o loo galulue i Vaoala. O le tama'ita'i o Mautagata Lavamanu Roger o loo aumau i Kalaiesetete Niu Sila, o le alii o Seumanutaa Solomona ma le tama'ita'i o Apaila Vai Salesulu o loo aumau i Melepone Ausetalia.

O le isi vaega o le fanau e toasefulutasi, ua maliliu. E 35 fanau a fanau, ae 7 fanau a fanau a fanau. E matua misi lenei tamā i totonu o lenei aulotu, ona e mauuluga lava le tulaga o lona soifua galue ma le soifua auauna. E matua tele foi se avanoa ua ia tuua, e leiloa pe faapefea ona faatumuina. Tau ina ia manuia lau malaga, maua sou nofoaga lelei i le maota o le Atua i le lagi, tatou feiloai i se aso o i luma.

Saunia:

Ionatana Tupolo (FS)

EFKS Vaipua.

O le Teineitiiti ma le Ta'ita'i'au Fiatagata

mai le itulau e 12

avefe'au mai ia Elisaia ma se tusi: "Tuli mai iinei Naamanu." Ona toe faavavevave atu ai lea o Naamanu i le fale o Elisaia. Ae le'i sau i fafo Elisaia mai lona fale e faafeiloa'i ia Naamanu, ae tuli mai iai le auauna. Na mafaufau Naamanu i le mea ua fai e Elisaia ona manatu ifo lea, "E le iloa e le tagata lenei o ai au? O a'u o le ta'ita'i'au lauiloa ma le taua!" Na matua oso i luga le fiva o Naamanu ina ua fai ane iai le auauna na tuli mai e Elisaia, "Alu e fulufulu i le vai lala."

Fai mai le tali a Naamanu, "Fulufulu i le vai le la? Fulufulu i le vai namuleaga ma le limulimua?" Ua vaavaai solo nei Naamanu poo se mea taufaa'ata o fai ia ia. Ae leai, o le tala sa'o lava a le auauna. "E mafai e soo se tagata ona mulumulu i le vai tafe. O a'u o Naamanu, o a'u o se tagata taua, e tatau ona ou faia se mea taua ina ia faamalolo ai a'u e le Atua." Ona oso ai lea i lana taavale

solofanua ma alu ese ma le ita.

Na silafia lelei lava e le Atua e sili atu ona ma'i o Naamanu i totonu i lona tagata lilo. O loo maua lona agaga i le ma'i lelepele e sili atu i ma'i o lona tino. Ma o le finagalo o le Atua, ia faamaloloina Naamanu i lona tino, ia faamaloloina foi o ia mai lona loto faamaualuga.

Ona malie ai lea o Naamanu e mulumulu i le vai tafe, ma o le taimi lava lea na malolo ai lona ma'i.

Na mana'o Naamanu e totogi ia Elisaia, ae tali Elisaia, "O le Atua na ia faamalolo ia te oe. E le totogia i ni tupe lana faamalologa!"

I le ua faamaloloina le tamaloa ma'i, ona o le teineitiiti nofo pologa loto faamagalogo.

Leadership:

Skill in the art o communication is crucial to a leader's success...He can accomplish nothing unless he can communicate effectively.


Norman Allen

O E UA FAI I LAGI LE FOLAUGA



**Elizabeth (Peka)
Matthes Ugapo Ulale**
16 Ianuari 1932-18 September 2014

mai le itulau e 13



**Seinafolava Akerei
Seinafolava**
15 Setema 1946-12 Novema
2016

upu e tautu pea iai - "Lau Susuga i le faifeau, seiloga lava e tuu ifo lo'u tagata i le tuugamau, ona e le toe vaai mai lea."

Ua le toe vaaia o ia, ae o loo ola pea ana galuega ma mea lelei e tele na ia



Ugapo L. Pusi Ulale AF
5 Tesema 1933-10 Me 2013

fai mo le galuega a le Atua. E moni lava: "O a latou galuega, e mulimuli mai ia te i latou."

Na faata'otolia faafuase'i i se gasegase faigata - (stroke). E lima aso na taofia ai i le falema'i o Tupua Tamasese Meaole i Motootua, ae te'a i tua. E ono aso i lona aiga, ae maliu loa ma le filemu - (17 Novema 2016)


O le aso 22 o Novema, na faia ai lona sauniga faale-aiga i le Maota Tapuai o le EFKS i Lotofaga. O a'u na taitai. Molimau le toatele o le aiga, fanau, uo, sui o le aulotu Faito'aga Tolua FS, ma Vaigafa Paleono FFA. Na faaaau i leoleoga o le po i lona maota.

O le aso 23 Novema, 10.00am, lona toe sauniga i le Maota Tapuai. Na auai le pulega a Lepa ma Lotofaga. O a'u na ta'ita'i: faaulufale le sa o le A'oa'o Fesoasoani - Malo Afia FS; Tusi Paia - Susuga Alesana FS; molimau - Talaogafa S. Akerei (faletua), Le Afioga i le Minisita o Tupe Maua Seinafolava Tionisio Hunt (sui o le aiga); Tupuola K. Tuala (sui o le nuu), Pamela Su'a. O le tatalo - Uaealesi Isaraelu FS, lauga - Faasalafa Alaovae FS, ma le faapoopoga a le ta'ita'i.

Sa mamalu ma pa'ia le sauniga ona o le mamalu o le Atua, ma le mamalu



**Emily Lina Hansell
(nee Bryce)**
29 Tesema 1926-23 Me2015



**Tuiena Galuo Tutonu
Niumata Galuo Fisi**
8 Iuni 1927-25 Mati 2015

o lana valaau faanatinati ia Seinafolava, aemaise lava le mamalu faale-malo, faale-atunuu, faale-Tala Lelei, o paolo ma gafa, o uo ma e masani na auai. Ona alu ai lea o le solo e molia le tino maliu o Seinafolava i lona alalafaga mau i lona maota i Lotofaga lava.

O a'u na ta'ita'i i lona sauniga i lona oliolisaga matagofie, ma faamavae atu ia te ia i le pese a le Au Kerisiano "Talofa uso e, tofaina oe..."

"Amuia lea auuana, o maua mai e lona Matai o faapena ona fai."

Ia faamaise le Agaga o le Atua i finagalo mafatia o le tina ia Talaogafa ma le fanau, aiga uma, uo, nuu le Pulega ma le Ekalesia.

Iosefa A. Uilelea FT.
EFKS Lotofaga